

HISTOIRE  
DE LA NAVI-  
GATION DE IEAN HV-  
GVES DE LINSOT HOLLANDOIS ET DE  
son voyage es Indes Orientales: contenant diuerſes descriptions des  
Pays, Coſtes, Haures, Riuieres, Caps, & autres lieux iuſques à preſent  
deſcouverts par les Portugais: Obſeruations des couſtumes des na-  
tions de delà quant à la Religion, Eſtat Politic & Domeſtic, de leurs  
Commerces, des Arbres, Fruicts, Herbes, Eſpiceries, & autres  
ſingularitez qui ſ'y trouuent: Et narrations des choſes  
memorables qui y ſont aduenues de  
ſon temps.

AVEC ANNOTATIONS DE BERNARD PALV-  
danus Docteur en Medecine, ſpecialement ſur la matiere des plantes &  
eſpiceries: & diuerſes figures en taille douce, pour illu-  
ſtration de l'œuure.

A QVOY SONT ADIOVSTEEES QUELQUES AV-  
tres descriptions tant du pays de Guinee, & autres coſtes d'Ethiopic,  
que des nauigations des Hollandois vers le Nord au Vay-  
gat & en la nouvelle Zembra.

LE TOVT RECUEILLI ET DESCRIPT PAR LE MESME  
de Linscot en bas Alleman, & nouvellement traduit  
en François.




A AMSTELREDAM,  
De l'Imprimerie de Henry Laurent.

M D C. X.



FIGURE DE L'ELEPHANT ET DU RHINOCEROS, & autres animaux des Indes.



CHAPITRE XLVII.

*De l'Abada ou Rhinoceros.*

*Rhinoceros ou se trouue, & sa description.* IL n'y a point d'Abada ou Rhinoceros es Indes, mais il s'en trouue en Bengala & Patana. Il est moindre que l'Elephant, porte vne courte corne aux narines, grosse en la partie d'enbas, aigue au bout, de couleur bleue sombre & tirant sur le blanc. Il a groin de porc, la peau ridee, & munie d'escailles. Il est ennemi de l'Elephant. Aucuns tiennent cest Animal pour la Licorne, pource qu'on n'en a encore veu nulle, & qu'on n'en parle q par oui dire. Les Portugais afferment pour chose vraye, & les habitans de Bengala en dient autant,



autant, qu'es enuiron du fleuue Ganges au Royaume de Bengala, il y a grande multitude de ces animaux, & d'autres qui venants au fleuue pour y boire, attendent que le Rhinoceros ait beu, pour boire apres. Car en beuuant il touche l'eau de sa corne qu'il porte au dessus des narines pres du groin : laquelle les Indiens tiennent par experience estre souueraine contre les venins, & autres maladies. Mesmes ils font grand cas de ses dents, de la corne de ses pieds, de sa chair, de son cuir, & de son sang à mesme effect, voire de sa fiente, comme ie l'ay experimenté moy mesme. Or le Rhinoceros n'est point par tout de mesme excellence. Car la corne d'aucuns est estimee cent, deux cents, trois cents pardauues, au lieu que celle d'autres n'en vaut que trois ou quatre. Et les Indiens ont la science d'en cognoistre les vertus, & les differences, encorés qu'elles soyent de mesme couleur & grandeur. La cause de ceste difference procede de la diuersité des herbes dont ils se nourrissent, lesquelles en certains endroits sont meilleures & plus saines qu'en d'autres. Es enuiron de Malacca, Sian, & Bengala se trouuent aussi certains cheureuls, qui ont la corne medecinale contre les venins, comme i'en ay fait l'essay. Ils sont appelez *Cabras de Mato*, cest à dire Cheureuls sauuages. L'an 1551. fut enuoyé des Indes vn Rhinoceros avec vn Elephant pour present au Roy d'Espagne estant lors à Lisbonne. Et voila ce que i'auoy à dire des oiseaux, & animaux terrestres qui se trouuent es Indes. Il y en a encore de diuerses autres especes : mais ie n'ay voulu entrer en la description sinon de ceux qui sont cognus, sans faire recit de ce qui est incognu & incertain.

Proprieté & vertu du Rhinoceros contre les venins.

La difference qu'il y a des vns aux autres.

Cheureuls sauuages.

## CHAPITRE XLVIII.

### Des Poissons, & monstres marins des Indes.

IL y a beaucoup de poissons es Indes, & aucuns de bon goust. Le meilleur de tous est celuy qu'ils appellent *Mordexin*, le *Pampan*, & le *Tatingus*. Il y a aussi vn poisson appellé *Peixaferra*, qu'ils coupent par trenchés comme le Saumon, puis le salent. Il est fort excellent & peut durer vn fort long voyage. Ils cuisent presques tous poissons avec du Riz, versant dessus certaine sausse quelque peu aigre & bien aggreable au goust qu'ils appellent *Carriil*, qui est comme sausse à l'aigret. Cest leur pitance ordinaire, le Riz leur seruant de pain. On y trouue de bonnes Alofes, des Soles & autres especes de poisson. Les Garnats ou cheurettos y sont si grandes, qu'vne douzaine suffit pour vn repas. Il y a pareillement de bonnes & grosses escreuisses, qui en cela different des nostres, qu'en pleine Lune elles sont vuides, au lieu que celles de deçà sont alors pleines de suc & de nourriture. Il s'y trouue beaucoup de Moules. Des Huistres pareillement en grand nombre principalement autour de Cochin & du Cap de Comorin, mais de peu d'estime. On y a du Poisson à bon marché : car pour deux sols on en peut auoir autant qu'il en faut pour vn disner de cinq ou six personnes, qui est vn bien petit prix en comparaison de ce qu'ils valent en Espagne & Portugal. On y trouue tant en la mer qu'es riuieres en grand'abondance certains poissons que les Portugais appellent *Tubarones* ou *Hayes* : lesquels sont fort pernicieux aux navigateurs, & causent la mort à beaucoup de pescheurs & de perles : à l'occasion dequoy on s'abstient de se baigner es riuieres, & y a certaines cisternes faites pour se lauer. Au temps que nostre nauire estoit en la riuiere de Cochin, le timon ayant esté réparé, comme il estoit question de le remettre en son lieu, vn des nauonniers estant en l'esquif avec quatre ou cinq Matelots

Diuerses especes de poissons es Indes.

Escreuisses.

Huistres.

Tubarones poissons pernicieux.

Triste exemple de la morsure d'vn tel poisson.